

# ÁRSSKÝRSLA 2019

Starfsáætlun 2020

**FRÆÐSLUMIÐSTÖÐ  
VESTFJARÐA**



**Fræðslumiðstöð Vestfjarða**  
Miðstöð símenntunar á Vestfjörðum

**Fræðslumiðstöð Vestfjarða**  
Kennitala 511199-2049  
Suðurgata 12, 400 Ísafjörður  
Heimasíða [frmst.is](http://frmst.is)  
Netfang [frmst@frmst.is](mailto:frmst@frmst.is)  
Ársskýrsla 2019 og starfsáætlun 2020

Mái 2020

## Efnisyfirlit

Efnisyfirlit.....	3
Fræðslumiðstöð Vestfjarða .....	5
Fulltrúaráð og stjórn Fræðslumiðstöðvar Vestfjarða árið 2019.....	6
Fulltrúar Fræðslumiðstöðvar í öðrum stofnunum .....	7
Starfsfólk Fræðslumiðstöðvar Vestfjarða árið 2019.....	7
Kennarar og leiðbeinendur.....	8
Starfsstöðvar og starfsaðstaða.....	8
Ísafjörður .....	8
Hólmavík.....	8
Patreksfjörður.....	8
Rekstur Fræðslumiðstöðvar Vestfjarða.....	9
Formlegir samstarfsaðilar.....	9
Mennta og menningarmálaráðuneytið .....	9
Fræðslumiðstöð atvinnulífsins – Fræðslusjóður .....	9
Háskólasetur Vestfjarða .....	10
Fjölmenn .....	10
Virk og Starfsendurhæfing Vestfjarða .....	10
Námið .....	11
Fjöldi námskeiða.....	11
Fjöldi þátttakenda .....	11
Fjöldi nemendastunda.....	12
Aldurskipting þátttakenda.....	14
Flokkun þátttakenda eftir kyni .....	14
Skipting eftir búsetu .....	14
Vottaðar námsleiðir.....	15
Réttindanámi.....	16
Íslenskunámskeið fyrir útlendinga .....	17
Almenn námskeið.....	18
Fullorðinsfræðsla fatlaðra .....	19
Þjónusta við fyrirtæki .....	19
Fræðslustjóri að láni.....	19
Fræðsla í fyrirtækjum .....	19
Samningar við sjóði .....	19
Þjónusta við Vinnumálastofnun á Vestfjörðum .....	20
Náms- og starfsráðgjöf/hvatningarviðtöl.....	20



Raunfærnimat .....	20
Gæðavottun .....	20
Persónuverndarstefna .....	21
Frístundafiskimenn .....	21
Próunarverkefni .....	21
Tuttugu ára afmæli Fræðslumiðstöðvar Vestfjarða .....	22
Starfsáætlun 2020 .....	23
Starfsmarkmið fyrir árið 2020 .....	23
Fjárhagsáætlun 2020 .....	24
Vottaðar námsleiðir .....	24
Náms- og starfsráðgjöf .....	25
Raunfærnimat .....	25
Íslenska fyrir útlendinga .....	25
Fullorðinsfræðsla fyrir fólk með fötlun .....	26
Erlend verkefni .....	26
Þjónusta við fyrirtæki og stofnanir .....	26
Lokaorð .....	26

## Fræðslumiðstöð Vestfjarða

Hér gefur að líta 20. ársskýrslu Fræðslumiðstöðvar Vestfjarða og er henni ætlað að lýsa starfsemi og verkefnum miðstöðvarinnar árið 2019. Einnig fylgir starfsáætlun fyrir árið 2020.

Fræðslumiðstöð Vestfjarða er sjálfseignarstofnun sem hefur það markmið að efla menntun á Vestfjörðum og þá einkum að standa fyrir fræðslustarfsemi sem ekki heyrir undir námskrárbundið nám á grunn- og framhaldsskólastigi, nema sérstaklega verði um það samið. Í þessu sambandi skulu þarfir atvinnulífs og íbúa sérstaklega hafðar í huga. Lögð skal áhersla á að sem flestir íbúar Vestfjarða hafi aðgang að þjónustu Fræðslumiðstöðvarinnar óháð búsetu. Fræðslumiðstöðin hafi enn fremur forgöngu um fjarkennslu á sem flestum sviðum.

Helstu verkefni sem starfsfólk Fræðslumiðstöðvar Vestfjarða sinnti á árinu 2019 voru:

- Umsjón með námsleiðum Fræðslumiðstöðvar atvinnulífsins
- Skipulagning og hönnun námskeiða
- Umsjón með almennum námskeiðum
- Hvatningarviðtöl/ráðgjöf
- Raunfærnimat
- Markviss þarfagreiningar
- Ráðgjöf til fyrirtækja
- Upplýsingarmiðlun
- Nemendabókhald
- Afgreiðsla og bókhald
- Undirbúningur fyrir gæðaúttekt
- Licted Evrópuverkefni
- Próftaka háskólanema og annarra á Hólmavík og Patreksfirði

Með samantekt þessari leggur Fræðslumiðstöð Vestfjarða fram gögn um starfsemi ársins 2019 og drög að starfsemi ársins 2020. Þar sem samantektin er unnin samkvæmt ákvæðum samnings sem grundvallaður er á lögum um framhaldsfræðslu er megin áhersla í samantektinni á þau áform sem miðstöðin hefur á sviði framhaldsfræðslunnar.

## Fulltrúaráð og stjórn Fræðslumiðstöðvar Vestfjarða árið 2019

Við Fræðslumiðstöðina er starfrækt fulltrúaráð, skipað einum fulltrúa frá hverjum stofnanda og einum til vara. Fulltrúaráðið er æðsta stjórn miðstöðvarinnar. Hlutverk þess er að ákveða meginþætti í stefnu og starfstilhögun Fræðslumiðstöðvar Vestfjarða.

Fulltrúaráð Fræðslumiðstöðvar Vestfjarða er þannig skipað:

Stofnun/samtök	Aðalfulltrúi	Varafulltrúi
Byggðasamlag Vestfjarða um málefni fatlaðs fólks	Sif Huld Albertsdóttir	Aðalstein Óskarsson
Félag opinberra starfsmanna á Vestfjörðum	Ragnheiður Ása Ingvarsdóttir formaður fulltrúaráðs	Hálfván Bjarki Hálfvánsson
Fjórðungssamband Vestfirðinga	Baldur Smári Einarsson	
Menntaskólinn á Ísafirði	Jón Reynir Sigurvinsson,	Hildur Halldórsdóttir
Náttúrustofa Vestfjarða	Nancy Bechtloff	Hulda Birna Albertsdóttir
Útvegsmannafélag Vestfjarða	Einar Valur Kristjánsson	Kristján G. Jóakimsson
Verkalýðsfélag Vestfirðinga (áður Alþýðusamband Vestfj.)	Ásdís Birna Pálsdóttir	Margrét Jóhanna Birkisdóttir
Vestfjarðastofa (áður Atvinnuþróunarfélag Vestfj.)	Sigríður Kristjánsdóttir	Aðalsteinn Óskarsson
Vinnuveitendafélag Vestfjarða	Kristján G. Jóhannsson	Sigurður Viggósson

Stjórn Fræðslumiðstöðvar Vestfjarða er skipuð fimm fulltrúum. Þrjú aðalfulltrúar og þrjú til vara eru kosnir á aðalfundi fulltrúaráðs, einn aðalfulltrúi og einn til vara eru tilnefndir af skólanefnd Menntaskólans á Ísafirði og þá á formaður fulltrúaráðs sjálfkrafa setu í stjórn og er varaformaður fulltrúaráðs varamaður hans. Stjórnin skiptir með sér verkum.

Stjórn Fræðslumiðstöðvar Vestfjarða skipa nú:

- Jón Reynir Sigurvinsson, formaður, Menntaskólanum á Ísafirði
- Ragnheiður Ása Ingvarsdóttir, Félagi opinberra starfsmanna á Vestfjörðum
- Arnheiður Jónsdóttir
- Kristján G. Jóhannsson, Vinnuveitendafélagi Vestfjarða
- Nancy Bechtloff, Náttúrustofu Vestfjarða

Varamenn stjórnar:

- Sif Huld Albertsdóttir, Byggðasamlagi Vestfjarða um málefni fatlaðs fólks
- Ásdís Birna Pálsdóttir, Verkalýðsfélag Vestfirðinga
- Einar Valur Kristjánsson, Útvegsmannafélagi Vestfjarða
- Margrét Birkisdóttir, Atvinnuþróunarfélagi Vestfjarða
- Hildur Halldórsdóttir, Menntaskólanum á Ísafirði

Á milli aðalfunda hélt stjórnin fimm bókaða fundi á árinu 2019.

## Fulltrúar Fræðslumiðstöðvar í öðrum stofnunum

Fræðslumiðstöð Vestfjarða á aðild að Háskólasetri Vestfjarða, Vestfjarðastofu og Starfsendurhæfingu Vestfjarða. Eftirtaldir eru fulltrúar miðstöðvarinnar á aðalfundi Háskólaseturs, aðalfundi Vestfjarðastofu og ársfundi Starfsendurhæfingar:

Háskólasetur Vestfjarða: Aðalmaður Dagný Sveinbjörnsdóttir og varamaður Sædis María Jónatansdóttir.

Vestfjarðastofa: Aðalmaður: Sædis María Jónatansdóttir og varamaður Dagný Sveinbjörnsdóttir

Starfsendurhæfing Vestfjarða: Aðalmaður Sædis María Jónatansdóttir og varamaður Sigurborg Þorkelsdóttir.

## Starfsfólk Fræðslumiðstöðvar Vestfjarða árið 2019

Í lok árs 2019 voru 9 fastir starfsmenn hjá Fræðslumiðstöð Vestfjarða. Á ársgrundvelli voru stöðugildin 5,8.

Á árinu urðu þær breytingar hjá starfsfólki Fræðslumiðstöðvar Vestfjarða að Efla Svanhildur Hermannsdóttir hætti sem forstöðumaður og við tók Sædis María Jónatansdóttir. Rut Einarsdóttir verkefnastjóri í Vesturbyggð og Tálknafirði og Ingibjörg Benediktsdóttir verkefnastjóri á Ströndum og Reykhólum létu báðar af störfum. Unnur Ólafsdóttir tók við starfi sem þjónustufulltrúi á Ströndum og Reykhólum.

### Starfsfólk Fræðslumiðstöðvar Vestfjarða árið 2019 var:

- Barbara Maria Gunnlaugsson, verkefnastjóri, 80% starfshlutfall.
- Dagný Sveinbjörnsdóttir, verkefnastjóri, 50% starfshlutfall.
- Elfa Svanhildur Hermannsdóttir, forstöðumaður, 100% starfshlutfall. Lét af störfum 31. júlí 2019.
- Elzibeta Pawluczuk, ræsting, 25% starfshlutfall.
- Helga Konráðsdóttir, verkefnastjóri og náms- og starfsráðgjafi, 100% starfshlutfall.
- Ingibjörg Benediktsdóttir verkefnastjóri á Ströndum og Reykhólum, 30% starfshlutfall. Lét af störfum 31. ágúst 2019.
- Kristín Pétursdóttir, bókari, 50% starfshlutfall.
- Rut Einarsdóttir, verkefnastjóri í Vesturbyggð og Tálknafirði, 50% starfshlutfall. Lét af stöfum 31. ágúst 2019.
- Sigurborg Þorkelsdóttir, verkefnastjóri og markþjálfari, 100% starfshlutfall.
- Sólveig Bessa Magnúsdóttir verkefnastjóri, 50% starfshlutfall.
- Sædis María Jónatansdóttir, forstöðumaður, 100% starfshlutfall. Hóf störf 1. ágúst 2019.

- Unnur Ólafsdóttir, þjónustustjóri á Ströndum og Reykhólum, 25% starfshlutfall. Hóf störf 1. nóvember 2019.

## Kennarar og leiðbeinendur

Stór hluti af starfsemi Fræðslumiðstöðvar Vestfjarða byggist á vinnu verktaka sem sjá um kennslu námskeiða og námsleiða. Verktakar sjá líka um að vera matsaðilar í raunfærnimati.

Fræðslumiðstöðin leggur mikla áherslu á að þeir sem kenna séu sérfræðingar á sínu sviði. Þótt miðstöðin sæki stundum kennara út fyrir svæðið þá er lagt mikið upp úr því að fá hæfa kennara sem búa á Vestfjörðum. Með því er verið að nýta þá þekkingu sem til er á svæðinu, byggja upp reynslu og skapa atvinnu.

Árið 2019 voru verktakar hjá miðstöðinni um 70 talsins og meiri hluti þeirra búsettur á Vestfjörðum.

## Starfsstöðvar og starfsaðstaða

Fræðslumiðstöð Vestfjarða er með starfsstöðvar á þremur stöðum á Vestfjörðum.

### Ísafjörður

Miðstöðin leigir rúmlega 300 fermetra húsnæði af Vestra ehf. á 1. hæð að Suðurgötu 12. Aðstaðan samanstendur af tveimur kennslustofum, fjórum skrifstofurýmum og sameiginlegu rými. Húsgögn í kennslustofum eru komin til ára sinna og einnig þær tölvur sem ætlaðar eru nemendum. Í raun eru tölvurnar varla lengur boðlegar til kennslu enda orðnar yfir tíu ára gamlar. Mikil þörf er því á endurnýjun þessa búnaðar. Eins væri ákjósanlegt að festa kaup á a.m.k. einni gagnvirkri töflu með innbyggðum skjávarpa.

### Hólmavík

Síðustu ár hefur Fræðslumiðstöðin verið með aðstöðu á þriðju hæð í Þróunarsetrinu á Hólmavík. Með ráðningu þjónustustjóra á Hólmavík varð sú breyting að starfsemin færðist í Dreifnámshúsið sem er að Hafnargötu 19. Í húsnæðinu er aðstaða til að taka á móti nemendum sem koma í próf og voru tekin 17 próf þar árið 2019. Námsverið er enn sem komið er í Hnyðju í Þróunarsetrinu.

### Patreksfjörður

Þekkingarsetrið SKOR veitir Fræðslumiðstöðinni aðstöðu á Patreksfirði. Í SKOR er námskeiðsaðstaða fyrir litla hópa og aðstaða til að taka próf hvort sem eru háskólapróf eða framhaldsskólapróf. Árið 2019 voru tekin 55 próf á Patreksfirði. Fyrir liggja breytingar í SKOR og því fyrirsjáanlegt að Fræðslumiðstöðin flytji sig um stað innan Patreksfjarðar.



## Rekstur Fræðslumiðstöðvar Vestfjarða

Árið 2018 varð viðsnúningur í rekstri Fræðslumiðstöðvar Vestfjarða eftir nokkur erfið rekstrarár. Mennta- og menningarmálaráðuneytið veitti miðstöðinni styrk í lok árs 2018 upp á 5 milljónir króna fyrir viðbótarframlag upp á 5 milljónir. Það fjármagn hefur nýst beint inn í framhaldsfræðsluna til að halda uppi starfsemi og þjónustu í dreifðum byggðum. Þar sem miðstöðin er með starfsemi í dreifðum byggðum skapast t.d. aukinn ferðakostnaður. Þá hefur ófærð og veður veruleg áhrif á starfsemina yfir vetrarmánuðina. Reynt hefur verið að vekja athygli á auknum kostnaði sem af þessu hlýst hjá Fræðslusjóði og mennta- og menningarmálaráðuneytinu.

Árið 2018 endaði með hagnaði upp á 10,9 milljónir og hagnaður ársins 2019 nemur 8,9 milljónum króna. Þar sem miðstöðin var rekin með halla um nokkurra ára bil hefur endurnýjun á búnaði verið í algjöru lágmarki. Því hefur skapast uppsöfnuð þörf varðandi endurnýjun á tölvu-, tækni og húsbúnaði.

## Formlegir samstarfsaðilar

### Mennta og menningarmálaráðuneytið

Fræðslumiðstöð Vestfjarða og mennta- og menningarmálaráðuneytið gerðu með sér samning þann 18. desember 2014 en hann rann út í lok árs 2018. Framhald á samningnum var gert fyrir árið 2019 en einungis til eins árs og er samningurinn nú laus. Í samningnum frá 2014 er kveðið á um þá þjónustu sem Fræðslumiðstöðin á að veita. Þar segir:

Fræðslumiðstöðin mun vinna að markmiðum framhaldsfræðslulaga nr. 27/2010 með því að reka miðstöð framhaldsfræðslu á Vestfjörðum; greina þarfir fyrir fræðslu og bjóða upp á ráðgjöf, raunfærnimat og námskeið fyrir markhópa, þ.á.m. bjóða fólki með erlend móðurmál íslenskukennslu. Þjónusta á sviði framhaldsfræðslu skal veitt og þróuð í samstarfi meðal annars við Fræðslumiðstöð atvinnulífsins, Fræðslusjóð og aðra hlutaðeigandi aðila. Fræðslumiðstöðin mun vera með fjarnáms- og kennsluaðstöðu á Vestfjörðum vegna framhaldsfræðslu og þjónustu við nemendur á framhaldsskólastigi eftir því sem þörf er á og fjárhagur leyfir.

Úthlutun til Fræðslumiðstöðvarinnar á fjárlögum ársins 2019 voru 20 milljónir auk viðbótarframlags upp á 4,6 milljónir. Það er áhyggjuefni að framlög á fjárlögum til miðstöðvarinnar eru óbreytt á milli ára og halda ekki í við verðlagsbreytingar.

### Fræðslumiðstöð atvinnulífsins – Fræðslusjóður

Fræðslumiðstöð atvinnulífsins (FA) er einkahlutafélag í eigu Alþýðusambands Íslands, Samtaka atvinnulífsins, BSRB, fjármála- og efnahagsráðuneytis og Sambands íslenskra sveitarfélaga. FA er með þjónustusamning við mennta- og menningarmálaráðuneytið annars vegar og símenntunarmiðstöðvarnar hins vegar.

Fræðslusjóður ráðstafar þeim framlögum sem Alþingi ákveður í fjárlögum hverju sinni. Úthlutanir Fræðslusjóðs greinast í meginatriðum í þrennt samkvæmt úthlutunarreglum sem ráðherra staðfestir:

- framlög til fræðsluaðila til að mæta kostnaði við kennslu og námskeiðahald
- framlög til að mæta kostnaði við raunfærnimat og náms- og starfsráðgjöf
- styrkveitingar til nýsköpunar- og þróunarverkefna í framhaldsfræðslu.

Fræðslumiðstöðin sækir á hverju ári um úthlutun úr sjóðnum. Fyrir árið 2019 fengust tæpar 19 milljónir til kennslu vottaðra námsleiða, rúmar 6,5 milljónir í raunfærnimat og rétt um 6 milljónir til náms- og starfsráðgjafar. Í september 2019 opnaði Fræðslusjóður fyrir viðbótarúthlutun vegna 2019. Fræðslumiðstöðin sótti um og fékk í þeirri úthlutun 3.4 milljónir vegna vottaðra námsleiða og 1,7 milljónir vegna náms- og starfsráðgjafar. Samtals numu því framlög Fræðslusjóðs árið 2019 ríflega 36 milljónum. Mikilvægi viðbótarúthlutunar úr Fræðslusjóði á árinu er ótvírætt.

### **Háskólasetur Vestfjarða**

Fræðslumiðstöð Vestfjarða og Háskólasetur Vestfjarða eru með samning sín á milli um að á Hólmavík og Patreksfirði sjái miðstöðin um framkvæmd prófatöku fyrir háskólana í landinu. Árið 2019 annaðist Fræðslumiðstöðin 72 próf fyrir Háskólasetrið. Fræðslumiðstöðin og Háskólasetur hafa einnig haft samvinnu sín á milli varðandi kennsluhúsnæði þegar önnur hvor stofnunin þarf auka kennslustofu.

### **Fjölmennt**

Fræðslumiðstöðin er með þjónustusamning við Fjölmennt – símenntunar og þekkingarmiðstöð um sí- og endurmenntun fyrir fólk með fötlun, 20 ára og eldra og hefur sá samningur verið endurnýjaður árlega. Í samningnum er tekið fram að miðstöðin eigi að bjóða upp á fjölbreytt námstækifæri fyrir fólk með fötlun á Vestfjörðum. Haldin voru 8 námskeið fyrir fatlaða á árinu 2019.

### **Virk og Starfsendurhæfing Vestfjarða**


Hlutverk Starfsendurhæfingar Vestfjarða er að veita einstaklingum starfsendurhæfingu sem hafa verið utan vinnumarkaðar vegna veikinda, slysa eða annarra aðstæðna og þurfa stuðning við endurkomu á vinnumarkaðinn. Fjármögnun SEV er að mestu í gegnum samstarfssamning við Virk starfsendurhæfingarsjóð. Fræðslumiðstöðin er stofnaðili að Starfsendurhæfingu Vestfjarða. Gott samstarf er við Starfsendurhæfinguna um þátttöku í námskeiðum. Það sama á við um Virk, einstaklingar sem eru í þjónustu þar geta sótt ákveðin námskeið hjá Fræðslumiðstöðinni sem hluta af sínum úrræðum.

## Námið

Á heildina litið náðust þau markmið sem sett voru fram í starfsáætlun fyrir árið 2019 varðandi nám og vel það. Gert var ráð fyrir 28.500 nemendastundum í heildina en í raun urðu þær 39.961. Þátttakendum fækkaði þó á milli ára og fjöldi námskeiða dróst saman. Hér á eftir eru helstu tölulegar upplýsingar um námið 2019.


## Fjöldi námskeiða

Fræðslumiðstöð Vestfjarða stóð fyrir 127 námskeiðum árið 2019. Til samanburðar voru námskeiðin 160 árið 2018 sem var lang mesti fjöldi námskeiða á einu ári frá stofnun Fræðslumiðstöðvarinnar. Vitað var að námskeiðum mundi fækka á milli ára þar sem toppnum í endurmenntunarnámskeiðum fyrir atvinnubílstjóra vegna reglugerðarbreytinga var náð árið 2018. Árið 2019 voru námskeið sem teljast til réttindanáms, þar með talin bílstjóranámskeiðin, 19 talsins til samanburðar við 31 árið 2018. Nokkur fækkun var líka í almennum námskeiðum, þau voru 61 árið 2019 en 73 árið áður. Íslenskunámskeiðunum fækkað um fimm, eru 31 en voru 36. Vottuðum námskeiðum fækkaði um tvær milli ára og sama gildir um námskeið fyrir fólk með fötlun.



## Fjöldi þátttakenda

Samanlagður fjöldi þátttakenda í öllu námi hjá Fræðslumiðstöð Vestfjarða árið 2019 var 1401 sem er töluverð fækkun frá árinu 2018 þegar þátttakendur voru 2075. Skipt eftir svæðum þá voru þátttakendur með skráð heimilisfang á norðanverðum Vestfjörðum 1.115, í Vesturbyggð og Tálknafirði 206, á Ströndum og Reykhólum 41 og 39 með skráð heimilisfang utan Vestfjarða.




Fækkun þátttakenda helst að nokkru leyti í hendur við fækkun námskeiða en er þó umfram það. Árið 2018 var að meðalfjöldi á hverju námskeiði 13 þátttakendur en 2019 var meðalfjöldinn 11 þátttakendur. Þarna hefur nokkuð að segja að í samanburði við fyrra ár var minna um fjölmenn námskeið fyrir fiskvinnslu- og fiskeldisfyrirtæki en einnig hefur fækkun bílstjóranámskeiða töluverð áhrif þar sem mörg þeirra voru nokkuð fjölmenn.


Rúmur helmingur þátttakenda, 779 manns, voru að sækja almenn námskeið, 208 eða tæplega 15% voru í réttindanámi, 255 voru skráðir á íslenskunámskeið, 97 tóku þátt í vottuðu námi og þátttakendur á námskeiðum fyrir fólk með fötlun voru 62. Hlutfallslega er lang mesta fækkun þátttakenda á milli ára í réttindanámi og skrifast það fyrst og fremst á færri bílstjóranámskeið.

### Fjöldi nemendastunda

Nemandastundir eru mælikvarði á umfang fræðslustarfs en þar er búið að margfalda fjölda nemenda á hverju námskeiði með fjölda kenndra kennslustunda á sama námskeiði. Starfsmarkmið fyrir árið 2019 voru 28.500. Markmiðið náðist og vel það þar sem nemendastundirnar enduðu í 39.961. Þetta er aukning frá árinu 2018 þegar nemendastundirnar voru rúmlega 34.000.



Fjölgun nemendastunda á milli 2018 og 2019 má að verulegu leyti rekja til þess að nemendastundum í vottuðu námi fjölgaði um rétt rúmlega 3.600, úr 10.579 í 14.590. Vottaðar námsleiðir eru að öllu jöfnu lengri en annað nám hjá Fræðslumiðstöðinni og umfang þeirra alltaf nokkuð þungt þegar fjöldi nemendastunda er skoðaður. Árið 2019 var einnig nokkur fjölgun nemendastunda í réttindanámi, úr 10.579 í 14.590.



Dreifing nemendastunda á milli svæða var ekki alveg í takti við það sem sett var fram í starfsmarkmiðum ársins 2019. Í markmiðunum er annars vegar horft til námskeiða sem eru niðurgreidd eða styrkt, þ.e. vottað nám með stuðningi Fræðslusjóðs, íslenska með stuðninga frá Rannís og nám fyrir fólk með fötlun í samstarfi við Fjölmenn, og hins vegar eru sett markmið fyrir annað nám sem eru þá almenn námskeið og réttind nám. Nemendastundir á norðanverðum Vestfjörðum eru vel yfir því sem gert var ráð fyrir, á sunnanverðum Vestfjörðum eru nemendastundir í niðurgreiddu námi nokkuð á pari við áætlun en aðeins undir í öðru námi. Hins vegar er langt frá því að markmið náist á Ströndum og Reykhólum. Nemendastundir í fjarkenndu námi eru yfir markmiðum en skiptingin á milli flokka er langt frá því sem gert hafði verið ráð fyrir.

Það helgast fyrst og fremst af því að aðeins var ein námsleið fjarkennd en mikið meira af réttindanámi fór í fjarkennslu en áætlað var.


Nemendastundir skipt eftir svæðum og flokkum – starfsmarkmið 2019 og árangur.				
Svæði	Niðurgreitt nám (vottaðar námsleiðir, íslenska og nám fyrir fatlaða)		Annað nám (almenn námskeið og réttindanám)	
	Markmið	Árangur	Markmið	Árangur
Norðursvæði	11.000	18.958	7.000	9.850
Suðursvæði	1.500	1.530	2.000	1.717
Strandir og Reykhólar	500	360	500	63
Fjarkennt	5.000	1.920	1.000	5.563

### Aldurskipting þátttakenda

Þátttakendur dreifast nokkuð jafn á hvert 10 ára aldursbil frá 25 ára og til 64 ára, um það bil 20% sem er mjög sambærilegt við fyrri ár. Ekkert eitt aldursbil sker sig áberandi úr. Rúmlega fimmtungur þátttakenda skiptist svo á milli aldurshópanna undir 25 ára og eldri en 65 ára. Þetta rímar mjög vel við að markhópur fullorðinsfræðslunnar er fyrst og fremst fólk á vinnumarkaði.

### Flokkun þátttakenda eftir kyni


Frá stofnun Fræðslumiðstöðvar Vestfjarða og allt til 2018 var töluverður kynjahalli á námskeiðum, körlum í óhag. Árið 2018 gerðist það hins vegar að karlar voru hlutfallslega fleiri en konur þótt ekki munaði miklu, 51% karlar og 49% konur, og mátti fyrst og fremst rekja það til endurmenntunarnámskeiða fyrir atvinnubílstjóra. Árið 2019 var gamla mynstrið komið aftur og konur meirihluti þátttakenda, 60% á móti 40%.



### Skipting eftir búsetu

Eðli málsins samkvæmt hefur umfang námskeiðahalds og þátttaka á námskeiðum verið langmest á norðanverðum Vestfjörðum þar sem mannfjöldinn er mestur. Árið 2019 var þar engin undantekning. Skipt eftir svæðum þá voru þátttakendur með skráð heimilisfang á norðanverðum Vestfjörðum 1.115, í Vesturbyggð og Tálknafirði 206, á Ströndum og Reykhólum 41 og 39 með skráð heimilisfang utan Vestfjarða.

Í samanburði við undanfarin ár var hlutfall þátttakenda sem eru búsettir í Ísafjarðarbæ, Súðavík eða Bolungarvík 80% sem er töluvert hærra. Að sama skapi fækkar þátttakendum hlutfallslega á sunnanverðum Vestfjörðum en þó sérstaklega á Ströndum og Reykhólum.




### Vottaðar námsleiðir

Vottaðar námsleiðir eru kenndar samkvæmt námskrám frá Fræðslumiðstöð atvinnulífsins með stuðningi Fræðslusjóðs og eru ætlaðar fólki sem ekki hefur lokið námi í framhaldsskóla. Á árinu 2019 voru alls 8 hópar í vottuðum námsleiðum hjá Fræðslumiðstöð Vestfjarða. Ólíkt undanförunum árum var ekkert *Grunnnámskeið fyrir fiskvinnslufólk* en Fræðslumiðstöðin var í samstarfi við fiskvinnslufyrirtæki um *Meðferð matvæla*. Þá var miðstöðin í samstarfi við Vinnumálastofnun og í þeim tilfellum voru kenndar námsleiðir sem ekki hefur áður verið boðið upp á. Annars vegar voru tveir hópar í námi sem kallast *MFA-skólinn* og hins vegar var byrjað á *Verkfærni í framleiðslu* en það nám teygði sig yfir á vorönn 2020. *Nám og þjálfun í almennum bóklegum greinum* fór fram á vorönn 2019 og undir lok árs var byrjað með hóp í *Grunnmenntaskóla* sem klárast vorið 2020. Í fyrsta skipti var boðið upp á nám sem kallast *Matarsmiðja – beint frá býli*. Miðað við reynslu annars staðar frá þótti líklegt að þátttakendur myndu falla utan markhóps framhaldsfræðslunnar, þ.e.a.s. hefðu lokið framhaldsskólanámi, og því ekki hægt að kenna það með stuðningi Fræðslusjóðs. Þess í stað var farið í samstarf við Vestfjarðastofu sem gerði það að verkum að hægt var að höfða til breiðari hóps. Námið hófst að hausti 2019 og fór inn á árið 2020.

Námsleið	Hópar
Grunnmenntaskólinn	1
Meðferð matvæla	2
MFA-skólinn	2
Nám og þjálfun í almennum bóklegum greinum	1
Matarsmiðja – beint frá býli	1
Verkfærni í framleiðslu	1


Samanlagður fjöldi þátttakenda í vottuðum námsleiðum voru 97 og hafa þeir ekki verið færri í mjög langan tíma. Til samanburðar voru 122 í vottuðu námi 2018 og 192 árið 2017. Skýring á færri þátttakendum felst að miklu leyti í því að hóparnir eru færri en undanfarin ár. Þrátt fyrir færri hópa og færri þátttakendur eru nemendastundirnar þó fleiri 2019 en árið áður, 14.590 í stað 10.579. Það má fyrst og fremst rekja til þess að námsleiðirnar sem kenndar voru 2019 voru flestar nokkuð langar. Sem dæmi er *MFA-skólinn* 350 kennslustundir og *Nám og þjálfun í almennum bóklegum greinum* 300 kennslustundir.



## Réttindanám

Fræðslumiðstöðin á í samstarfi við nokkra aðila varðandi réttindanám og fer það eftir eftirspurn hverju sinni hvað er í boði. Miðstöðin er í samstarfi við Menntaskólann á Ísafirði um viðbótarnám í vélgæslu og um húsnæði, til dæmis fyrir verklegan hluta í vélgæslunámi. Þá er miðstöðin í samstarfi við Skipstjórnarskóla Tækniskólans um smáskipanám og er með leyfi frá Samgöngustofu frá 2017 til að kenna endurmenntunarnámskeið sem atvinnubílstjórar þurfa að sækja til þess að endurnýja atvinnuréttindi sín.






Alls voru þátttakendur í réttindanámi 208 sem er mjög mikil fækkun frá fyrra árið þegar þeir voru 583. Rétt er að geta þess að árið 2018 var algjör undantekning varðandi fjölda í þessum flokki sökum mjög margra og fjölmennra námskeiða fyrir atvinnubílstjóra. Hins vegar er fjöldi nemendastunda í réttindanámi meiri árið 2019 en nokkru sinni fyrr. Helgast það fyrst og fremst af því að í stað margra stuttra námskeiða, eins og endurmenntunarnámskeiða fyrir atvinnubílstjóra sem voru mest áberandi 2018, gekk vel að koma á löngum námskeiðum, bæði í skipstjórn og vélstjórn. Smáskipanám, sem er 115 kennslustundir var bæði kennt að vori og hausti, þrjú hópar voru í vélavarnámi sem eru 85 kennslustundir og þrjú hópar fóru af stað í viðbótarnámi í vélgæslu sem er 135 kennslustundir. Tveir þessara hópa munu ljúka sínu námi árið 2020.

### Íslenskunámskeið fyrir útlendinga

Kennt var 31 námskeið í íslensku fyrir útlendinga árið 2019 sem er fækkun um 5 námskeið frá árinu áður. Fræðslumiðstöðin fékk úthlutað fjármagni frá Rannís fyrir sem nemur 28 námskeiðum sem hvert er 30 kennslustundir. Fræðslumiðstöðin er því í raun að kenna fleiri íslenskunámskeið en fjárframlög hins opinbera gera ráð fyrir til þess að mæta eftirspurn og þörf.


Vegna færri námskeiða var fjöldi þátttakenda og fjöldi nemendastunda minni en árið áður sem var algjört met ár hvað varðar íslenskunámskeið hjá Fræðslumiðstöðinni. Engu að síður kemur árið 2019 mjög vel út, alls voru þátttakendur 255 og nemendastundirnar 7.635.



Samdráttinn á milli 2018 og 2019 má meðal annars rekja til þess að árið 2018 voru sett upp nokkur íslenskunámskeið í tengslum við verkefni um móttöku flóttamanna frá Sýrlandi og Írak, en 2019 voru þau námskeið að mestu búin. Þá munaði um að starfsmaður miðstöðvarinnar á sunnanverðum Vestfjörðum, sem hafði verið mjög öflugur í íslenskukennslu, lét af störfum og ekki var fyllt í það skarð. Ákveðnar nýjungar voru í íslenskukennslu fyrir Taíendinga, en tveir kennarar hafa í sameiningu þróað og kennt þeim hópi í fjarkennslu í samvinnu við Fræðslumiðstöðina. Verkefnið lofar góðu og heldur áfram árið 2020. Einnig var gerð tilraun með fjarkennslu á byrjendanámskeiði fyrir pólskumælandi hóp með pólskum kennara og verður það þróað áfram. Fjarkennslan er góður kostur þegar illa gengur að ná í lágmarksfjölda þátttakenda á sama staðnum til að halda úti sérstöku námskeiði.

### Almenn námskeið

Eins og fram hefur komið er stærstur hluti þátttakenda í námi hjá Fræðslumiðstöðinni að sækja það sem kallað er almenn námskeið. Í þessum flokki eru bæði tólmstundanámskeið og námskeið sem líta má á sem endurmenntun og starfsþróun. Samanlagður fjöldi þátttakenda árið 2019 var 779 og nemendastundirnar 6.627.



Í samanburði við fyrra ár þá fækkaði bæði þátttakendum og nemendastundum. Þetta er í takti við þá þróun sem sést hjá öðrum símenntunarmiðstöðvum og mun væntanlega halda áfram. Tímstundanámskeið eiga erfitt uppdráttar og áherslurnar eru að færast sífellt meira í þá átt að auka framboð starfstengdra námskeiða. Þar gegnir mikilvægu hlutverki samstarf við fyrirtæki á svæðinu um gerð fræðsluáætla, sem í kjölfarið getur leitt til námskeiða sem styðja við atvinnulífið.

### **Fullorðinsfræðsla fatlaðra**

Á námskeiðum fyrir fólk með fötlun urðu nemendastundirnar á árinu 543 og þátttakendurnir 62. Þetta er fækkun nemendastunda en þátttakendafjöldinn stendur í stað á milli ára. Fækkunin skýrist helst af því að námskeiðin 2019 voru færri, 8 í stað 10 árið áður, og styttri.

### **Þjónusta við fyrirtæki**

Á árinu 2019 hefur Fræðslumiðstöðin haldið áfram með þá línu sem lögð var 2017 að leggja áherslu á að efla tengsl við fyrirtækin á svæðinu, bæði með því að bjóða upp á starfstengd námskeið og aðra þjónustu eins og verkefnið Fræðslustjóra að láni.

#### **Fræðslustjóri að láni**

Verkefnið Fræðslustjóri að láni byggist á að lána mannauðsráðgjafa til fyrirtækja sem er sérhæfður í vinnustaðafræðslu og óformlegri menntun. Ráðgjafinn fer yfir fræðslu- og þjálfunarmál fyrirtækisins, dregur fram það sem vel er gert, gerir eða dýpkar greiningu á þörfum fyrirtækisins og samhæfir við önnur námskeið eða viðurkenndar fræðsluleiðir innan óformlega fræðslukerfisins. Afurð verkefnisins er sérsniðin fræðsluáætlun þar sem búið er að leggja línurnar í fræðslumálum marga mánuði fram í tímann. Árið 2019 var lokið við eitt verkefni sem fór af stað árið áður og unnið að einu verkefni frá grunni. Þá var hafinn undirbúningur að tveimur fræðslustjóraverkefnum sem voru síðan sett í bið en þau fara vonandi af stað 2020.

### **Fræðsla í fyrirtækjum**

Fræðslumiðstöðin hefur verið að sækja í sig veðrið varðandi starfsþróunarnámskeið. Starfsþróunarnámskeið eru styrkt af sjóðum verkalýðssamtaka og geta fyrirtæki fengið u.þ.b. 75% af kostnaði endurgreiddan vegna slíkra námskeiða. Slík námskeið eru oft sérsniðin að þörfum fyrirtækisins og getur fræðslan verið hvort sem er á vinnustaðnum eða í húsakynnum Fræðslumiðstöðvarinnar. Mörg af þeim starfsþróunarnámskeiðum sem Fræðslumiðstöðin heldur koma í framhaldi af fræðslustjóra verkefnum hjá fyrirtækjum.

### **Samningar við sjóði**

Í upphafi árs 2018 var gerður tilraunasamningur milli Fræðslumiðstöðvarinnar og sjóðanna Sveitamenntar og Ríkismenntar. Það þýðir að allir starfsmenn sem vinna hjá ríki eða sveitafélagi og greiða til Verkalýðsfélags Vestfirðinga eða Verkalýðs- og sjómannafélags Bolungarvíkur geta sótt starfstengd námskeið sér að kostnaðarlausu, þ.e. sjóðurinn greiðir fyrir sitt félagsfólk og Fræðslumiðstöðin sækir námskeiðsgjöldin beint í sjóðinn. Mikil ánægja hefur verið með þetta fyrirkomulag og vonandi að fleiri sjóðir fylgi í kjölfarið og geri slíka samninga fyrir sína félaga.

Samstarf Fræðslumiðstöðvarinnar og stéttarfélagins Sameykis er smækkuð mynd af þessum samningi en þar velur Sameyki nokkur námskeið og býður sínum félagsmönnum að sækja sér að kostnaðarlausu, bæði starfstengd námskeið og námskeið sem ætlað er að efla fólk í daglegu lífi. Starfsmennt hefur boðið aðildarfélögum sínum á 1-2 starfstengd námskeið á hverri önn og þá er gerður samningur við miðstöðina í hvert skipti.

### **Þjónusta við Vinnumálastofnun á Vestfjörðum**

Fræðslumiðstöðin vinnur mikið með Vinnumálastofnun á Vestfjörðum og er samstarfið í tengslum við ráðgjöf, úrræði og annað sem stofnunin er að leita eftir hverju sinni. Árið 2019 voru kenndar þrjár vottaðar námsleiðir fyrir atvinnuleitendur auk námskeiða um atvinnuleit og íslensku.

### **Náms- og starfsráðgjöf/hvatningarviðtöl**

Hjá Fræðslumiðstöðinni starfar einn náms- og starfsráðgjafi auk eins starfsmanns sem lokið hefur framhaldsnámi sem ACC markþjálfari. Saman sinna þessir starfsmenn hvatningar- og þróunarsamtölum til ráðþega auk þess sem nú er hægt að bjóða upp á náms- og starfsráðgjöf. Frá árinu 2017 hefur verið boðið upp á hvatningarviðtöl á pólsku og hefur það verið töluvert notað. Í starfsmarkmiðum fyrir árið 2019 var gert ráð fyrir að fjöldi viðtala yrði að minnsta kosti 450. Það markmið náðist og gott betur því alls voru veitt um 527 viðtöl árið 2019. Það er aukning frá fyrra ári þegar viðtölin voru 407.

### **Raunfærnimat**

Framlag Fræðslusjóðs til raunfærnimats á árinu 2019 var rúmlega 6,5 milljónir. Úthlutað var til fiskvinnslu og fiskeldis, þjónustubrauta (t.d. félagsliða og leikskólaliða), almennrar starfshæfni og iðngreina í samstarfi við IÐUNA. Alls fóru 18 manns í gegnum raunfærnimat. Í starfsmarkmiðum fyrir árið 2019 var gert ráð fyrir mun fleiri einstaklingum í raunfærnimat eða allt að 40. Ákveðið var að flytja hluta af raunfærnimatinu yfir á næsta ár en raunfærnimatsárið er 18 mánuðir og er því fram á mitt ár 2020.

### **Gæðavottun**

Tilvist gæðakerfis með áherslu á nám fullorðinna er eitt af skilyrðum þess að teljast viðurkenndur fræðsluaðili í fullorðinsfræðslu af mennta- og menningarmálaráðuneytinu. Fræðslumiðstöðin hefur verið með EQM gæðavottunina (European Quality Mark) frá árinu 2013. EQM er gagnsætt matsferli fyrir fræðsluaðila til að meta starfshætti sína út frá viðurkenndum gæðaviðmiðum. EQM tekur mið af gæðum þjónustunnar sem fræðsluaðili veitir, innri gæðastjórnun og verklagsreglum fræðsluaðila og hvernig núverandi starfshættir samræmast viðurkenndum gæðaviðmiðum. Fræðslumiðstöð atvinnulífsins er með samning um EQM-úttektir og á slík úttekt að fara fram reglulega. Upphaflega náði vottunin aðeins til náms hjá miðstöðinni en nú er raunfærnimat og náms- og starfsráðgjöf einnig undir. Til stóð að Fræðslumiðstöðin færi í úttekt á árinu 2019 en henni var frestað fram á næsta ár. Á árinu 2019 var töluvert unnið í undirbúningi fyrir matið, sérstaklega varðandi þá þætti starfseminnar sem hafa ekki áður verið með í úttekt.

## Persónuverndarstefna

Á árinu 2019 var byrjað að vinna að persónuverndarstefnu fyrir Fræðslumiðstöðina í samræmi við ákvæði laga nr. 90/2018 um persónuvernd og vinnslu persónuupplýsinga og reglugerð ESB nr. 2016/679 (GDPR) um vernd einstaklinga í tengslum við vinnslu persónuupplýsinga og frjálst flæði slíkra upplýsinga. Haft var samstarf við Símenntunarmiðstöðina á Vesturlandi og Farskólann á Norðurlandi vestra. Vinnan kláraðist að mestu leyti á árinu en samþykkt stefnunnar og birting á heimasíðu verður í byrjun árs 2020.

## Frístundafiskimenn

Frá sumrinu 2012 hefur Fræðslumiðstöðin í samvinnu við ferðaþjónustufyrirtæki og með leyfi Samgöngustofu séð um próf sem lögð eru fyrir erlenda frístundafiskimenn sem koma til Vestfjarða og hafa ekki nauðsynleg réttindi. Standist þeir prófið fá þeir tilskilin réttindi samkvæmt reglugerð nr. 1005/2010 um frístundafiskiskip og öryggi þeirra og námsskrá.

Sumarið 2019 gengust 95 einstaklingar af 8 þjóðernum undir próf. Voru prófin haldin á fjórum stöðum, Suðureyri, Flateyri, Súðavík og Bolungarvík á tímabilinu maí til september.

## Þróunarverkefni

Árið 2019 var áfram haldið áfram með Erasmus+ samstarsverkefnið sem hófst árið áður og Fræðslumiðstöðin leiddi. Verkefnið heitir LICTED in rural communities sem útleggst á íslensku sem Læsi og tæknilæsi í fullorðinsfræðslu í dreifðum byggðum. Tilgangur verkefnisins var að skoða hvernig kennarar geti aðstoðað nemendur sem eru með litla færni í læsi eða upplýsingatækni. Á árinu sóttu starfsmenn Fræðslumiðstöðvarinnar tvo vinnufundi, í Lettlandi og Þýskalandi. Verkefninu lauk með kynningu sem haldin var í Fræðslumiðstöðinni í byrjun sumars þar sem hagsmunaaðilum og öðrum áhugasömum var boðið. Sama gerðu hinir fræðsluaðilarnir hver í sínu heimalandi. Heimasíða verkefnisins er [www.licted.eu](http://www.licted.eu).

Haldið var áfram að vinna að gerð námsefnis um velferð fiska í tengslum við laxeldi, verkefni sem fékk styrk úr þróunarsjóð Fræðslusjóðs atvinnulífsins árið 2018. Verkefnið var unnið í samvinnu við Ann Cecile Hilling sem sá um gerð námsefnisins. Verkefninu lauk að mestu árið 2019 en lokaskýrslu verður skilað 2020.

Fræðslumiðstöðin studdi við verkefni tveggja íslenskukennara sem unnu að þróun á íslenskukennslu í fjarnámi fyrir Tailendinga. Um er að ræða röð námskeiða og var fyrsti hlutinn tilraunakenndur vorið 2019. Um haustið var haldið áfram og fleiri námskeið kennd. Fyrirkomulagið virðist henta vel og lofar góðu um áframhaldandi samstarf.

Þá hóf Fræðslumiðstöð þátttöku í Erasmus+ verkefni sem kallast Blue mentor sem hefur það að markmiði að efla nám í fiskeldi. Verkefnið er á byrjunarstigi. Þátttakendur eru frá Íslandi, Noregi og Skotlandi.

## Tuttugu ára afmæli Fræðslumiðstöðvar Vestfjarða

Fræðslumiðstöð Vestfjarða var stofnuð á degi símenntunar, 28. ágúst 1999 og fagnaði því 20 ára starfsafmæli árið 2019. Í tilefni af þessum tímamótum var miðstöðin með opið hús á afmældisdaginn þar sem boðið var upp á nokkur stutt erindi, tónlistaratriði og veitingar. Þátttaka fór fram úr björtustu vonum og voru vel yfir 100 manns sem litu við, nemendur, kennarar, samstarfsaðilar og velunnarar.

Í tilefni afmælisins var boðið upp á þrjú örnámskeið á haustönn sem voru opin öllum og án þátttökugjalds. Námskeiðin fjölluðu um ólík efni, næringu og hreyfingu, líðan og tilfinningar og haustverkin í garðinum. Þátttakan var mjög góð.

## Starfsáætlun 2020

### Starfsmarkmið fyrir árið 2020

Á árinu 2020 setur Fræðslumiðstöð Vestfjarða sér að ná eftirtöldum markmiðum í starfsemi sinni.

- Heildartekjur verði umfram heildargjöld.
- Fjöldi nemendastunda í vottuðum námsleiðum, íslensku fyrir útlendinga og námi fyrir fatlaða verði  $\geq 20.000$ .
  - Þar af verði fjöldi nemendastunda á norðursvæði Vestfjarða  $\geq 16.000$ .
  - Þar af verði fjöldi nemendastunda á suðursvæði Vestfjarða  $\geq 1.500$ .
  - Þar af verði fjöldi nemendastunda á Reykhólum og Ströndum  $\geq 300$ .
  - Þar af verði fjöldi nemendastunda í fjarkennslu eða dreifnámi  $\geq 2.200$ .
- Fjöldi nemendastunda í öðru námi verði  $\geq 12.500$ 
  - Þar af verði fjöldi nemendastunda á norðursvæði Vestfjarða  $\geq 6.600$ .
  - Þar af verði fjöldi nemendastunda á suðursvæði Vestfjarða  $\geq 1.700$ .
  - Þar af verði fjöldi nemendastunda á Reykhólum og Ströndum  $\geq 200$ .
  - Þar af verði fjöldi nemendastunda í fjarkennslu eða dreifnámi  $\geq 4.000$ .
- Fjöldi viðtala hjá náms- og starfsráðgjafa verði  $\geq 350$ .
- Fjöldi þátttakenda í raunfærnimati í fisktækni/fiskeldi verði  $\geq 15$ .
- Fjöldi þátttakenda í raunfærnimati í samstarfi við lðuna  $\geq 4$ .
- Fjöldi þátttakenda í raunfærnimati í almennum bóklegum greinum  $\geq 3$ .
- Fjöldi þátttakenda í raunfærnimati í þjónustubrautum verði  $\geq 9$ .
- Fjöldi þátttakenda í raunfærnimati í skipsstjórn í samstarfi við Visku verði  $\geq 6$ .
- Fjöldi þátttakenda í raunfærnimati í rafiðngreinum verði  $\geq 1$ .
- Þátttakendur í raunfærnimati verði frá öllum svæðum Vestfjarða.
- Fjöldi útseldra klukkustunda í fræðslugreiningum (MARKVISS) verði  $\geq 200$ .
- Fræðslumiðstöð taki þátt í Erasmus+ þróunarverkefni sem kallast Blue mentor.
- Tryggja frekara samstarf við starfsmenntasjóði.
- Að þróa frekar fjarkennslunámskeið í íslensku fyrir útlendinga og auka framboð á öðru námi í fjarkennslu.
- Að vinna áfram að innleiðingu á Innu.
- Að ljúka vinnu við EQM+ gæðavottun.

## Fjárhagsáætlun 2020

Fjárhagsáætlun byggir á þeim starfsmarkmiðum sem Fræðslumiðstöð Vestfjarða hefur sett sér á árinu 2020 og þeim forsendum sem fyrir þeim liggja.

Í desember 2019 voru fastir starfsmenn 9 í um það bil 5,8 stöðugildum. Reiknað er að bætt verði við 0,5 stöðugildi á sunnanverðum Vestfjörðum árið 2020. Miðstöðin mun áfram reka mannaðar starfsstöðvar á þremur stöðum á Vestfjörðum.

Heildartekjur Fræðslumiðstöðvar Vestfjarða árið 2019 eru áætlaðar um 108,5 milljónir og heildargjöld um 107,5 milljónir króna.

Nánari sundurliðun er í meðfylgjandi töflum. Það er gert ráð fyrir tækjakaupum á árinu 2020.

Tekjur	Áætlun 2019	Raun 2019	Áætlun 2020
<b>Framlög og styrkir</b>			
Rekstrarsamningar vegna framhaldsfræðslu	20.000.000	23.100.000	20.000.000
Viðbótarframlag vegna framhaldsfræðslu	5.000.000	4.633.927	4.700.000
Viðbótarframlag af fjárlögum	3.000.000	0	
Styrkir v/erlendra verkefna, þróunarstarf	5.300.000	5.339.509	1.400.000
Flutt frá fyrra ári		565.500	
	<b>33.300.000</b>	<b>33.638.936</b>	<b>26.100.000</b>
<b>Sí- og endurmenntun</b>			
Flutt frá fyrra ári			4.524.000
Tekjur vegna námskeiða og verkefna	42.730.000	44.951.977	39.235.000
Íslenska fyrir útlendinga, Rannís	4.000.000	4.000.000	4.500.000
Fræðslusjóður (FA)	29.201.750	36.841.560	31.130.000
Fjölmennt	3.000.000	3.000.000	3.000.000
	<b>112.231.750</b>	<b>122.432.473</b>	<b>108.489.000</b>
<b>Gjöld</b>			
Verkefna- og námskeiðskostnaður	34.600.000	33.467.455	28.000.000
Laun og launatengd gjöld	60.000.000	63.540.643	64.200.000
Skrifstofu- og stjórnunarkostnaður	6.500.000	6.661.584	6.900.000
Annar rekstrarkostnaður	7.000.000	9.529.005	8.000.000
Fyrningar		418.297	400.000
	<b>108.100.000</b>	<b>113.616.984</b>	<b>107.500.000</b>
<b>Afkoma fyrir fjármagnsliði</b>	<b>4.131.750</b>	<b>8.815.489</b>	<b>989.000</b>

## Vottaðar námsleiðir

Framlög Fræðslusjóðs til kennslu vottaðra námsleiða árið 2020 er 18.030 þúsund krónur. Áætlað er að kenna 8 námsleiðir í 10 hópum; samtals 638 klukkustundir. Reiknað er með að meðaltali rúmlega 10 þátttakendum í hverjum hópi. Áætlað er að 3-4 námsleiðanna verði fjarkenndar, a.m.k. að hluta.



*Vottaðar námsleiðir sem áætlað er að kenna árið 2020.*

Námsleið	Hópar	Staður	Klst í heild	Kennt	VÖ20	HÖ20	Alls klst
Verkfærni í framleiðslu	1	Norðanv. Vest	160	S.hl.	96		96
Grunnmenntaskóli	1	Norðanv. Vest	200	S.hl.	67		67
Íslensk menning og samfélag	2	Norðanv. Vest	106	Öll	212		212
Grunnnámskeið fyrir fiskvinnslufólk	2	Vestfirðir	48	Öll	48	48	96
Líf og heilsa	1	Vestfirðir	60	F.hl.		30	30
Opin smiðja	1	Flateyri	80	Öll		80	80
Samfélagstúlkun	1	Vestfirðir	87	F.hl.		57	85
<b>Alls kennsla</b>	<b>9</b>				<b>423</b>	<b>215</b>	<b>638</b>

### Náms- og starfsráðgjöf

Framlag Fræðslusjóðs til náms- og starfsráðgjafar á árinu 2020 er 4.598 þúsund krónur auk 674 þúsund króna í akstur og ferðalög. Áætlað er að þetta dugi fyrir hið minnsta 350 viðtölum.

### Raunfærnimat

Framlag Fræðslusjóðs til raunfærnimats á árinu 2020 er samtals kr. 7.828 og skiptist þannig á greinar:

- Almennar bóklegar greinar 659.000
- Fiskvinnsla og fiskeldi kr. 4.875.000
- Iðngreinar í samstarf við IÐUNA kr. 292.500
- Þjónustubrautir 1.791.000
- Rafiðngreinar 30.950
- Skipstjórn (samstarf Viska) 179.550

Af árinu 2019 voru færðar kr. 4.524.250 til raunfærnimats, þannig að samtals til raunfærnimats á árinu 2020 eru 12.352.250 krónur.

### Íslenska fyrir útlendinga

Fræðslumiðstöð Vestfjarða gerir ráð fyrir að kenna 34 námskeið í íslensku fyrir útlendinga á árinu 2020. Hvert námskeið er 30 kennslustundir og er gert ráð fyrir 8 þátttakendum á hverju námskeiði.

## Fullorðinsfræðsla fyrir fólk með fötlun

Fræðslumiðstöð Vestfjarða hefur í mörg ár verið í samstarfi við Fjölmennt – símenntun og þekkingarsetur um kennslu og þjónustu við fólk með fötlun. Hefur Fjölmennt veitt styrki til þeirrar kennslu.

Á árinu 2020 er áætlað að kenna fólki með fötlun 120 stundir og að fjöldi þátttakenda verði 60. Að auki er fyrirhugað að nota hluta af framlagi Fjölmenntar til að greiða fyrir nám með stuðningi.

## Erlend verkefni

Fræðslumiðstöð Vestfjarða er þátttakandi í einu Evrópuverkefni sem er Blue Mentor. Þátttökuþjóðir eru Ísland, Noregur og Skotland. Markmið verkefnisins er að bæta fiskeldisnám og gera það aðgengilegt í dreifðum byggðum. Sjónum verður beint að samfelldri námsskrá milli skólastiga og starfsþjálfun á vettvangi. Áætluð lok eru 2021.

## Þjónusta við fyrirtæki og stofnanir

Fræðslumiðstöð Vestfjarða býður fyrirtækjum og stofnunum stuðning í fræðslu- og starfsmannamálum.

- Aðstoð við starfsmannabróun með námskeiðum fyrir atvinnulífið.
- *Fræðslustjóri að láni* þar sem fram fer greining fræðsluþarfa með greiningarkerfinu Markviss. Verkefnið undir heitinu Fræðslustjóri að láni eru styrkt af starfsmenntasjóðum.
- Sérniðin starfstengd námskeið samkvæmt beiðnum fyrirtækja og stofnana.
- Leiðsögn um hvar er hægt að sækja um styrki vegna fræðslu starfsmanna.
- Hæfnigreining starfa.

## Lokaorð

Fræðslumiðstöð Vestfjarða var stofnuð á degi símenntunar, 28. ágúst 1999 og fagnaði því 20 ára afmæli á árinu. Óhætt er að segja að starfsemin hafi þróast, vaxið og dafnað þessa tvo áratugi en eins og aðrir á þroskagöngu hefur miðstöðin tekist á við ýmis krefjandi verkefni í rekstrinum í gegnum árin. Afmælisáfanganum hefði ekki verið náð nema fyrir viðskipti og þátttöku íbúa og fyrirtækja á Vestfjörðum í verkefnum miðstöðvarinnar. Það ber að þakka.

Helsta verkefni miðstöðvarinnar er efling mannauðs með menntun, ráðgjöf og raunfærnimati. Lögð er áhersla á samvinnu við atvinnulífið við val á starfstengdu námi og að hægt sé að leggja stund á nám samhliða vinnu. Þá heldur Fræðslumiðstöð íslenskunámskeið fyrir útlendinga sem eru lykill að virkri þátttöku þeirra í samfélaginu.

Markmið Fræðslumiðstöðvar er að leggja grunn að símenntun með það að leiðarljósi að skapa einstaklingum tækifæri til náms alla ævi. Að baki hugmyndinni um nám alla ævi býr sú hugsun að ef einstaklingur á að vera fær um að lifa og starfa í nútíma lýðræðisþjóðfélagi, sem tekur örum breytingum, þarf hann að hafa tækifæri til að mennta sig alla ævi.

Hjá Fræðslumiðstöð er veittur stuðningur til persónulegs vaxtar. Markhópur Fræðslumiðstöðvar er ekki hvað síst þeir einstaklingar sem hætt hafa námi í formlega skólakerfinu áður en skilgreindum námslokum var náð. Ástæður slíks brotthvarfs frá námi geta verið margvíslegar og mikilvægt er að einstaklingum sé mætt af vinsemd, virðingu og skilningi og leggur starfsfólk miðstöðvarinnar áherslu á að gera það.

Hjá Fræðslumiðstöð er leitast við að byggja upp þekkingu, færni og sjálfstraust. Það er gefandi að sjá fólk þróa styrkleika sína og hæfileika. Einstaklingurinn er aldrei fullmótaður og getur vaxið og þróast alla æfi, en til þess að svo megi vera þarf þolinmæði, aðhald og jákvæða hvatningu. Starfsfólk Fræðslumiðstöðvar Vestfjarða mun, hér eftir sem áður, leitast við að skapa einstaklingum góð skilyrði til persónulegs vaxtar.

Ein af grunnstoðum í starfsemi Fræðslumiðstöðvar Vestfjarða er það samstarf sem hún á við Fræðslumiðstöð atvinnulífsins, starfsmenntasjóði og verkalýðshreyfinguna. Gott samstarf við sveitarfélög, fyrirtæki og stofnanir á svæðinu skiptir Fræðslumiðstöðina líka afar miklu máli. Mikilvægt er að þessir aðilar nýti sér starfsemi miðstöðvarinnar.

Með virku samstarfi tekur námsframboðið mið af þörfum samfélagsins hverju sinni. Saman getum við sem lifum og störfum á Vestfjörðum lagt grunn að sí- og endurmenntun í heimabyggð, aukið menntun og lífsgæði íbúa svæðisins og eflt þannig einstaklinga og atvinnulíf.

Við hlökkum til komandi verkefna og samstarfs,  
f.h. Fræðslumiðstöðvar Vestfjarða,

*Sædís María Jónatansdóttir, framkvæmdastýra*